

U skladu sa čl. 2., 3. i 28. Zakona o mjerama za unapređenje stočarstva ("Službene novine Federacije BiH", broj 23/98), a na osnovu čl. 34. i 35. stav 1. Zakona o kantonalnoj upravi ("Službene novine Kantona Sarajevo", br. 14/97 i 20/98), Ministarstvo privrede, donosi

PRAVILNIK

O MJERAMA ZA UNAPREĐENJE STOČARSKE PROIZVODNJE NA PODRUČJU KANTONA SARAJEVO

Član 1.

Ovim pravilnikom uređuju se lokaliteti po općinama na kojima se zabranjuje držanje stoke, uređuju zoohigijenski i zootehnički uslovi držanja stoke (goveda, konja, ovaca, plemenitih pasmina koza, svinja, peradi, kunića i pčela), oplodavanje i licenciranje stoke, držanje i gajenje pčela na području Kantona Sarajevo (u daljem tekstu: Kanton).

Član 2.

Na području Kantona Sarajevo utvrđuje se režim držanja stoke zavisno od područja općine.

Član 3.

Na području općine Stari grad Sarajevo, zabranjuje se držanje stoke na području mjesnih zajednica "Bašaršija", "Ferhadija", "Kovači", "Mjedena", "Logavina 1", "Logavina 2", "Medresa 1", "Medresa 2", "Babića bašča", "Bistrik", "Vratnik 1", "Vratnik 2" i "Sumbuluša" i u užoj zaštitnoj zoni planinskih izvorišta za piće Sarajevskog vodovodnog sistema: "Moščanica", "Crnil", "Sedrenik", "Vrelo vode" i "Uroševo vrelo", izuzev pernate živine i kunića i to na području koje je ograničeno sljedećim ulicama: Čadordžina do raskršća ulice Logavina, ulicom Logavina do raskršća ispod Budakovića, ulicom ispod Budakovića do raskršća sa ulicom Medresa, ulicom Medrese do raskršća sa ulicom Safvet bega Bašagića, ulicom Kiseljačka do raskršća sa ulicom Nova mahala, ulicom Nova mahala do raskršća sa ulicom Sumbul česma, ulicom Sumbul česma do raskršća sa ulicom Strošići, ulicom Strošići do ulice Prijeka česma, ulicom Prijeka česma do raskršća sa ulicom Mačkareva, ulicom Mačkareva do ulice Čebedžije donje, ulicom Čebedžije donje do ulice Carina, ulicom Podžebhanom do ulice Zvornička, ulicom Zvornička do raskršća ulice Ispod grada, vazdušnom linijom do Miljacke a zatim vazdušnom linijom na raskršću ulice Hošin brijeg, Podcarina i Kozija ćuprija, ulicom Hošin brijeg do raskršća sa ulicom Kačanik mali, ulicom Kačanik mali do raskršća sa ulicom Nalina, Podhridom i ulicom Iza hrida, ulicom Iza hrida do ulice Huremuša, ulicom Huremuša do ulice Bistrik (Bistrički most), od Bistričkog mosta ulicom Pastrma do raskršća ulica Zabeglukom i Hambina carina i ide ulicom Cicin han do granice sa općinom Centar. U ulicama koje su navedene kao granične zabranjuje se držanje stoke.

Na područjima mjesne zajednice "Sedrenik" dozvoljava se držanje stoke iznad ulice "Sedrenik", a držanje kunića i pernate živine između ulice "Sedrenik" i linije opisane u stavu 3. ovog člana pod uslovima propisanim ovim pravilnikom.

Na područjima mjesnih zajednica: "Hrid", "Jarčedoli", "Mahmutovac", "Toka", "Džeka" i "Širokača" dozvoljava se držanje stoke iznad granice opisane u stavu 3. ovog člana pod uslovima propisanim ovim pravilnikom.

Na području mjesne zajednice "Moščanica" dozvoljava se držanje stoke pod uslovima propisanim ovim pravilnikom.

Član 4.

Na području općine Centar Sarajevo stoka se može držati samo na područjima mjesnih zajednica: "Nahorevo", "Mrkovići" i "Betanija" (izuzev zona obuhvaćenim prostornim cjelinama "Betanije", "Univerzitetski medicinski centar" i "Zelena transversala").

Na području mjesnih zajednica "Nahorevo", "Betanija" (izuzev zona obuhvaćenim prostornim cjelinama "Betanije", "Univerzitetski medicinski centar", "Hrastovi 2", "Pionirska dolina", "Mrkovići" i "Soukbunar" iznad Kasindolske ulice) građani mogu držati samo pernatu živinu.

Na ostalim područjima općine Centar zabranjeno je držanje stoke.

Član 5.

Na području općine Novo Sarajevo zabranjeno je držanje stoke na područjima sljedećih mjesnih zajednica: "Željeznička", "Trg Heroja", "Hrasno", "Čengić Vila 1", "Čengić Vila 2", "Malta", "Grbavica 1", "Grbavica 2", "Kvadrant", "Dolac", "Gornji Kovačići" (izuzev dijela ulice Ohridska - rejon Debelog brda), "Hrasno brdo" (izuzev desne strane ulice Novopazarske do granice sa općinom Novi Grad), "Pofalići 2" (Ispod granične linije), Pofalići 1 (ispod granične linije), "Donji Velešići" (ispod granične linije) i "Gornji Velešići" (ispod granične linije).

Povlači se granična linija kojom se odvajaju područja zabrane držanja stoke od dozvoljenih područja za držanje stoke za mjesne zajednice "Pofalići 1", "Pofalići 2", "Donji Velešići" i "Gornji Velešići".

Dozvoljava se držanje stoke na lijevoj strani od granične linije koja počinje od granice sa općinom Novi Grad, Buća potok od preduzeća "Zrak" pravcem preko pravoslavnog groblja od dalekovodnog stuba (na parceli k.č. 2466/1 K.O. Novo Sarajevo I) ulijevo pravcem do kuće Orlovačka broj 280, zatim ide lijevom stranom ulice Orlovačka od broja 280 do 240, od broja Orlovačka 240 skreće ulijevom i ide lijevom stranom ulice do broja 204, od broja Orlovačka 204 skreće desno i ide pravcem do broja Orlovačka 160, od broja Orlovačka 160 skreće lijevo i ide pravcem do raskršća ulicom Humsko brdo i Humska do broja 342, od broja Humska 343 ide lijevom stranom pravcem do broja 373 i skreće ulijevo idući do broja Humska385, skreće udesno i ide lijevom stranom ulice Humska ispod rezervoara u Gornjim Pofalićima preko brojeva 443 i 447 do raskršća sa ulicom Reisa Fehima Spahe broj 163, skreće udesno i spušta se lijevom stranom ulice Reisa Fehima Spahe do broja 96 (starog rezervoara) skreće ulijevo i spušta se pravcem do broja Čikma Reisa Fehima Spahe broj 163, od broja Čikma Reisa Fehima Spahe 163 ide pravcem na gornju ogradu strelišta (parcela k.č. 932 K.O. Novo Sarajevo I), od ograde strelišta ide vazdušnom linijom od ulice Velešići do broja 136, od broja Velešići 136 ide pravcem na dalekovodni stub (parcela K.O. 810 K.O. Novo Sarajevo I), skreće ulijevo i ide lijevom stranom ulice Gornji Velešići (uz ulicu) do raskršća do broja Gornji Velešići 281 (sa gornje strane raskršća) ide preko raskršća 100 metara naprijed do broja Gornji Velešići 98 skreće udesno i spušta se pravcem preko broja Gornji Velešići 66 do broja ulica Mehmeda Efendije Pandže 275, skreće ulijevo i ide pravcem preko starog vojnog rezervoara (k.č. 179 K.O. Novo Sarajevo I) do granice sa općinom Centar.

Zabranjeno je držanje stoke u zaštitnim zonama: Pofalići I - zona klizišta, Pofalići - Velešići potez Mljekara - Grand hotel, Mehorića voćnjak, Pofalići - Velešići zona iznad strelišta i zona spomen-parka "Vraca".

Član 6.

Na području općine Novi grad Sarajevo dozvoljeno je držanje stoke na sljedećim lokalitetima:

"Dobroševići", "Mihaljevići", "Ahatovići", "Bojnik", "Rajlovac" (između pruge i rijeke Bosne), "Reljevo", "Rječica", "Zabrđe", "Smiljevići", "Perivoj", "Žuč", "Dvor", "Briješće polje", "Briješće brdo" iznad zone individualnog stanovanja.

Područja (lokaliteti) gdje je dozvoljeno držanje stoke u zoni individualnog stanovanja na području općine Novi Grad su:

MZ "Naselja Heroja - Sokolje", padinska područja MZ "Švrakino Selo I, II i III" (padinski dijelovi iznad ulice Safeta Hadžića), padinsko područje MZ "Hrasno" i "Aneks" (ulica Vrbovska na granici sa Novopazarskom ulicom), MZ "Saraj Polje" (područje Nedžarići), padinska područja MZ "Alipašin Most I i II" (padinski dijelovi sjeverno od ulice Safeta Zajke), padinska područja MZ "Dolac" i MZ "Buća Potok" (padinski dijelovi ulice Safeta Zajke).

Na ostalim područjima općine Novi Grad zabranjeno je držanje stoke.

Član 7.

Na području općine Hadžići zabranjeno je držanje stoke na sljedećim lokalitetima:

Hadžići

Granica polazi u ulici Hadželi kod broja 15, skreće u pravcu sjeverozapada ogradom preduzeća "Ingrap" u korito Zujevine i koritom ide do mosta u ulici Andželka Blažetića. Sa mosta skreće i obilazi kompleks doma zdravlja, izlazi na ulicu Andželka Blažetića i ulicom ide do raskrsnice sa Omladinskom ulicom. Od raskrsnice Omladinskom ulicom do broja 2 pa ogradom fudbalskog stadiona, sportske dvorane, srednjoškolskog centra i osnovne škole. Kod osnovne škole ulazi u korito rijeke Zujevine i koritom ide uzvodno do željezničkog mosta za Remontni zavod gdje izlazi iz korita rijeke Zujevine pored "Papir servisa" ide na jugoistok do željezničke pruge Sarajevo - Ploče. Prugom ide u pravcu Sarajeva do broja 28 u ulicu Tinohovska i tom ulicom do broja 1. Tu skreće u pravcu istoka u ulicu Žunovačka kod broja 40 i tim dijelom ulice ide do trafostanice ili broja 52. Iz ulice Žunovačke preko mosta skreće na istok u Igmansku ulicu i ide na sjever Igmanskom ulicom pored brojeva 119, 120, 30 i 28. Kod broja 28 Igmanske ulice skreće na sjeveroistok i izlazi na Igmansku ulicu kod broja 32. Igmanskom ulicom ide u pravcu sjeverozapada do broja 15, gdje sa Igmanske ulice pored broja 137 ide na sjever, prelazi željezničku prugu Sarajevo - Ploče, dolazi u ulicu Hadželići i tom ulicom ide do broja 15 od koga je granica i krenula.

Pazarić

Granica polazi od broja 20 u ulici Bjelašničkoj i sa sjeverne strane na udaljenosti od 20 metara i ide paralelno sa ulicom Bjelašničkom na zapad do broja 50 gdje skreće u korito rijeke Zujevine. Koritom rijeke Zujevine ide uzvodno do broja 10 u Željezničkoj ulici, na sjever do broja 24 u istoj ulici, a onda skreće na istok Omladinskom ulicom do broja 8, gdje skreće na sjever do željezničke pruge Sarajevo - Ploče, ide prugom u pravcu Mostara do broja 52 u Željezničkoj ulici. Od broja 52 Željezničke ulice granica ide na jug paralelno sa Željezničkom ulicom do broja 13, ulazi u korito Resnik, ide uzvodno iza stambene zgrade na

broju 70 u Bjelašničkoj ulici. Pored doma kulture sa zapadne strane ide na jug do korita potoka Kradenika kod broja 78, od broja 78 uzvodno koritom potoka Kradenik granica ide sa sjeverne strane Bjelašničke ulice do broja 108 koji se nalazi na raskršću ulica Bjelašničke i Radnička. Tu granica ide na jug u ulicu Novo naselje do broja 1, od broja 1 skreće na istok paralelno sa Bjelašničkom ulicom sa južne strane na udaljenosti od 20 metara, ide do broja 53 a onda ogradom oko osnovne škole "9. maj" Pazarić, prelazi u ulicu "9. maj" i do ambulante na broju 31. Od ambulante paralelno sa južnom stranom ulice Bjelašničke na udaljenosti od 20 metara, granica ide na istok do potoka Jedrinje i potokom do broja 20 Bjelašničke ulice gdje se završava.

Tarčin

Granica polazi na raskrsnici ulica IX brdske brigade i ulice Mrdžana Džoke i ide paralelno sa zapadnom stranom ulice Mrdžana Džoke na udaljenosti od 20 metara do Tuheljske ulice, gdje ide na jug preko ulice Mrdžana Džoke, iza ambulante naselja zvanog Žegrap i međom kompleksa osnovne škole do puta za Korču. Putem za Korču ide na sjever do ulice Mrdžana Džoke, tu skreće na istok paralelno sa južnom stranom ulice Mrdžana Džoke do puta za Japalak, kojim ide do kraja kompleksa Silosa i oko njega se vraća na sjever paralelno sa istočnom stranom puta za Japalak do ulice Mrdžana Džoke, odakle ide paralelno sa južnom a potom istočnom stranom ulice Mrdžana Džoke na udaljenosti od 20 metara do ulice IX brdske brigade gdje se završava.

Na ostalim područjima općine Hadžići dozvoljeno je držanje stoke.

Član 8.

Na području općine Ilijaš zabranjeno je držanje stoke u urbanom dijelu (sadašnja MZ Ilijaš) na sljedećim granicama:

Granica počinje od potoka Gnionice uzvodno do sportskog igrališta, odakle produžava pored Novog Naselja zahvatajući naselja Banovac, te društvene stambene zgrade sve do mosta na rijeci Misoči, odakle nastavlja dijelom regionalnog puta Sarajevo - Kakanj, pored RO Željezara do rijeke Bosne, a odatle nizvodno do polazne tačke tj. ušća potoka Gnionice u Bosnu.

Na području općine Ilijaš dozvoljeno je držanje stoke na sljedećim lokalitetima:

MZ "Lješevo" (Lješevo, Odžak), MZ "Ljubnići" (Ljubnići, Balbegovići, Čifluk i Banjer), MZ "Podlugovi" (Podlugovi, Sovrle), MZ "Mrakovo" (Mrakovo, Salkanov Han, Popovići), MZ "Kadarići" (Kadarići); MZ "Bioča" (Gornja Bioča, Donja Bioča), MZ "Malešići" (Malešići, Ribarići, Karaula), MZ "Ilijaš Stari" (Vlaškovno, Donja i Gornja Luka, ul. Bosanski put, Mlini, Gajice), MZ "Misoča" (Gornja i Donja Misoča), MZ "Ilijaš" (Karašnica, Novo Naselje); MZ "Srednje" (Srednje, Stupe, Medojevići, Bolešiće, Visojevica, Šići, Vilić, Klek, Košare, Vulenjača, Stublina, Luka, Ozren, Šatorica, Razdolje, Šljeme, Vrana, Moševići), MZ "Čevljanovići" (Donji Čevljanovići, Donji Ivančići); MZ "Gajevi" (Gornji Čevljanovići, Vrutci, Vuksanovići, Donje Selo, Homar, Draževići, Ravne Podlipnik, Rakova noga, Sudići, Lipnik), MZ "Dragoradi" (Dragoradi, Gajine, Vladajevići), MZ "Nišići" (Nišići, Gornji Ivančići, Krivojevići, Duševine, Sabanci, Borak, Lotege, Buljetovina, Krčevina, Hadžići), MZ "Kamenica" (Odžak, Drinčići, Gradina, Dautovići, Elezovići, Paljike, Jelik), MZ "Ljubina" (Ljubina, Kožlje, Solakovići, Vidotina, Ulištovići, Velika njiva, Stupe, Taračin Do, Višnjica, Tisovik, Korita, Han Karaula, Zakotnica, Karačići).

Član 9.

Na području općine Trnovo zabranjeno je držanje stoke na lokalitetima "Rekreativno-turistički kompleks Bjelašnice i Igmana".

Na svim ostalim područjima općine Trnovo dozvoljeno je držanje stoke.

Član 10.

Na području općine Ilidža zabranjeno je držanje stoke na sljedećim lokalitetima:

U naseljima: Stup, Ilidža, Sokolovići, Bare, Stojčevac, Vreoca, Vrutci, Bačevo, Vrelo Bosne, Konaci, Plandište i urbaniziranim dijelovima Butmira i Otesa.

Pored navedenih naselja granica područja zabrane držanja stoke počinje od lijeve obale rijeke Miljacke, na mjestu gdje je granica općine Ilidža i općine Novo Sarajevo do mjesta gdje željezna ograda novog aerodroma izlazi na stari put Sarajevo - Trnovo. Od ove tačke granica ide u pravcu juga obuhvaćajući novi aerodrom, izostavljajući naseljeno mjesto Donji Kotorac i naselje Butmir, ide granicom novog aerodroma prema zapadu do upravne zgrade GP "Igman" gdje izlazi na Butmirsku cestu i ide u pravcu rijeke Željeznice, preko imanja PD "Butmir" do ušća rijeke Tilave u rijeku Željeznicu. Od ovog mjesta granica ide uzvodno rijekom Željeznicom do 300 metara iznad bivše industrijske pruge, skreće u pravcu jugozapada (obuhvatajući naselje Sokolovići) i izlazi na Hrasničku cestu iznad vrtlarije. Od ove tačke granica nastavlja Hrasničkom cestom prema Ilidži do raskršća sa poljskim putem iznad zabavnog parka (kod kuće Višnjevac Vlade). Od ovog raskršća granica ide u pravcu jugozapada poljskim putem koji vodi u naselje Bare, obuhvata naselje Bare, prelazi preko riječice Večarice (izostavljajući naselje Glavogodinu i Lipe) bivšom granicom naselja Glavogodina - Stojčevac do podnožja Igmana. Od ove tačke granica ide u pravcu sjeverozapada po izohipsi 550 nv do iznad objekta "Elektroprenosa" na Vrelu Bosne, obuhvata te objekte, silazi na cestu Sarajevo - Mostar, koju presijeca i ide u pravcu željezničke pruge Sarajevo - Ploče granicom naseljenih mjesta Sarajevo - Blažuj do mjesta zvanog "Slana bara". Od ove tačke granica ide željezničkom prugom prema Sarajevo do željezničkog mosta na rijeci Željeznici, zatim nizvodnom rijekom Željeznicom do sjeverne granice urbanističkog dijela naselja Otes, obuhvatajući urbanistički dio granicom urbanizacije i ponovo izlazi na željezničku prugu Ploče - Sarajevo kod kuće Bagarić Josipa. Od ove tačke granica ide željezničkom prugu u pravcu Sarajeva do mosta na rijeci Miljacki, zatim nizvodno rijekom Miljackom do polazne tačke.

U naseljenom mjestu Hrasnica granica područja zabrane držanja stoke počinje od raskršća Hrasničke ceste i ulica Igmanskih bataljona, Put Famosa (kod stare škole) ide ulicom Igmanskih bataljona, nastavlja ulicom Sabita Užičanina, produžava ka ulici stari Drum obuhvatajući skladište Ogrev, prelazi preko ulice Stari Drum do rijeke Večarice, uzvodno rijekom Večericom do ušća potoka Ruševik, ide uzvodno potokom Ruševik te ispod groblja na Pandurici izlazi na put koji vodi ispod mejdana (pored Starog mlina) prema rijeci Večerici, uzvodno rijekom Večericom do ušća potoka Bunica, zatim uzvodno potokom Bunica do iznad doma "Partizan", i stadiona "Famos", gdje silazi na ulicu Šehitluci, ide ovom ulicom do Lasičke ceste, i istom produžava do ulice Put Famosa, i ide ulicom Put Famosa do polazne tačke.

U naseljenom mjestu Blažuj granica područja zabrane držanja stoke počinje od nadvožnjaka u Blažuju, ide željezničkom prugom u pravcu Ploča do industrijske pruge za tvornicu drvenih ploča "Bosanka", ide ovom prugom do mosta na rijeci Zujevina, zatim nizvodno rijekom

Zujevinom, obuhvatajući objekte preduzeća Šumaprodukt izlazi na polaznu tačku na nadvožnjak.

Na svim ostalim područjima općine Ilidža dozvoljeno je držanje stoke.

Član 11.

Na području općine Vogošća zabranjeno je držanje stoke na sljedećim lokalitetima:

Ulice Igmanska, Jošanička, Vogošćanskih odreda, Feriza Merzuka, Remzije Veje, Branilaca Vijenca, Braće Kršo, Izeta Delića, Akifa Ef. Biserovića, Spasoja Blagovčanina, Skendera Kulenovića, Partizanskog Odreda Zvijezda, Tome Mendesa, Omladinska, Safeta Krupića, te mjesna zajednica Semizovac (ul. Nova Cesta do prvog mosta i stara cesta do Nebočaja), mjesna zajednica Hotonj (naselje Nizovi od B 1 do B 13), mjesna zajednica Kobilja Glava (uz Magistralni put Sarajevo Vogošća od autobuske stanice Gornji Hotonj do table Kobilja Glava, na okuci kod auto servisa).

Na svim ostalim područjima općine Vogošća dozvoljeno je držanje stoke.

Član 12.

Na lokalitetima na kojima je dozvoljeno držanje stoke moraju se primjeniti sljedeće zootehničke i zoohigijenske mjere:

stoka se mora držati u dvorištu za stoku odvojeno ogradom od stambenog prostora,

štale, svinjci, kokošinjci (u daljem tekstu: "objekti za smještaj stoke") kao i ostali gospodarski objekti, moraju biti suprotno od ulaza u stambeni prostor,

objekti za smještaj stoke kao i ostali gospodarski objekti i đubrišta moraju biti udaljeni od stambenog prostora najmanje 20 (dvadeset) metara, a od bunara, izvora i drugih tekućih voda najmanje 40 (četrdeset) metara,

objekti za smještaj stoke kao i ostali gospodarski objekti moraju se držati čisti, uredni, dovoljno osvijetljeni i prozračni i moraju se dezinficirati krečnim mlijekom ili drugim dezinfekcionim sredstvom najmanje četiri puta godišnje,

uz svaki objekat za smještaj stoke mora postojati odvodni kanal priključen na javnu kanalizacionu mrežu. Na mjestima gdje ne postoji kanalizacija, odvodni kanal mora biti povezan sa osočnom jamom, propisno izgrađenom od betona i sa betonskim poklopcem,

mjesta za odlaganje đubreta (đubrišta) moraju biti izgrađena od betona,

prilikom postavljanja objekata za smještaj stoke kao i đubrišta, mora se voditi računa o konfiguraciji terena, da se otpadne vode ne bi slijevale prema izvorima tekuće i pijaće vode,

zabranjeno je puštanje stoke po ulicama, željezničkim i tramvajskim prugama, parkovima i drugim javnim površinama,

OPLOĐAVANJE I LICENCIRANJE STOKE

Član 13.

Oplođavanje stoke je zootehnička i zdravstvena mjera, i vrši se vještačkim osjemenjavanjem i prirodnim pripustom.

Član 14.

Vještačko osjemenjavanje stoke na području Kantona, sprovodi Javno preduzeće "Kantonalna veterinarska stanica Sarajevo" (u daljem tekstu: Veterinarska stanica).

Veterinarska stanica iz stava 1. ovog člana, dužna je kvalitetno i stručno vršiti osjemenjavanje, uredno voditi evidenciju osjemenjene stoke u koju se upisuju broj životinje, ime vlasnika, ime, broj i pasmina bika, blagovremeno vršiti liječenje oboljele i jalove stoke i za navedene usluge izdati potvrdu vlasniku sa cijenom koštanja.

Član 15.

Vještačko osjemenjavanje stoke vrši se na svim općinama na području Kantona, izuzev sela Tušila i Bobovica, sa područja općine Trnovo gdje je dozvoljeno prirodno oplodavanje stoke.

Član 16.

Općinska služba nadležna za poslove stočarstva (u daljem tekstu: općinska služba) dužna je najkasnije do 01. 03. tekuće godine organizovati popis muške priplodne stoke, i dostaviti podatke Ministarstvu privrede Kantona Sarajevo (u daljem tekstu: Ministarstvo) do 10. 03. tekuće godine.

Općinska služba će u skladu sa popisom stoke iz stava 1. ovog člana, u saradnji sa Veterinarskom stanicom utvrditi lokalitete, vrijeme licenciranja i kastriranje stoke.

Član 17.

Ministarstvo imenuje Komisiju čiji zadatak je odabir (licenciranje) muške priplodne stoke odgovarajuće pasmine, na području Kantona, na osnovu podataka iz člana 16. stav 1. ovog pravilnika.

Komisija će vlasniku, ili držaocu muške priplodne stoke izdati potvrdu o korištenju priplodne stoke, koja važi jednu godinu od dana odabira licenciranih grla.

Po završenom odabiranju Komisija će sačiniti zapisnik o izvršenom odabiru i dostaviti resornom ministarstvu.

Član 18.

Općinska služba nadležna za poslove poljoprivrede, općine Trnovo, dužna je da zaključi posebne ugovore sa vlasnicima ili držaocima muške priplodne stoke, o korištenju priplodne stoke za navedeno područje.

Član 19.

Vlasnici ili držaoci muške priplodne stoke koja se koristi za priplod, dužni su da vode propisno knjigu evidencije u koju se upisuju podaci o broju oplodjenih plotkinja, datum oplodnje, pasmini, starosti plotkinje, matični broj ili tetovir broj grla, ime i prezime i mjesto prebivališta odnosno boravka vlasnika ili držaoca priplodne stoke.

Član 20.

Za vještačko i prirodno oplodavanje priplodne stoke, vlasnici ili držaoci priplodne stoke čija se stoka oplodava plaćaju novčanu naknadu.

Naknada za vještačko osjemenjavanje plaća se veterinarskoj stanici na području na kome se vrši vještačko osjemenjavanje, a naknada za prirodno oplodavanje plaća se vlasniku ili držaocu muške priplodne stoke.

Cijenu usluge vještačkog i prirodnog osjemenjavanja utvrđuje veterinarska stanica.

Član 21.

Kantonalno ministarstvo organizuje i snosi troškove kastracije neodabrane (nelicencirane) muške priplodne stoke.

DRŽANJE I GAJENJE PČELA

Član 22.

Pčelarstvom shodno odredbama ovog pravilnika smatra se držanje i gajenje pčela i proizvodnja meda i drugih pčelinjih proizvoda.

Član 23.

Vlasnici ili držaoci pčela (u daljem tekstu: držaoci pčela), dužni su se pridržavati mjera propisanih ovim pravilnikom, radi unapređenja pčelarstva, te zdravstvene i druge zaštite pčela.

Član 24.

Korištenje medonosnog bilja za pčelinju pašu slobodno je, i vrši se bez naknada.

Član 25.

Držalac pčela je dužan da postavi pčelinjak tako da ne smeta drugim licima.

Na pčelinjaku mora biti istaknuta ploča, sa oznakom imena i prezimena i mjestom prebivališta ili boravka držaoca pčelinjaka, i brojem nastanjenih košnica u pčelinjaku.

Član 26.

Radi korištenja pčelinje paše držalac pčela može samo zdrave pčele premještati sa jednog mjesta na drugo.

Držalac pčela je dužan da o mjestu gdje se preseljava pčelinjak, prije preseljavanja obavijesti općinsku službu, na čijoj se teritoriji nalazi pčelinja paša. Zemljište za postavljanje pčelinjaka, može se koristiti uz prethodnu saglasnost vlasnika odnosno korisnika tog zemljišta.

Član 27.

Pčele se transportuju u zatvorenim i osiguranim košnicama tako, da u toku prijevoza ne može doći do otvaranja košnica ili gušenja pčela.

Član 28.

Med i drugi pčelinji proizvodi koji se stavljaju u promet ne smiju sadržavati materije štetne za zdravlje čovjeka, moraju biti mikrobiološko hemijski ispitani, kod ovlaštenih institucija. Troškove hemijskog ispitivanja uzoraka snosi držalac pčela.

Član 29.

Vlasnik odnosno korisnik zemljišta, dužan je omogućiti držaocu pčela praćenje i hvatanje odbjeglog roja.

Ako držalac pčela u slučaju iz prethodnog stava, pričini štetu vlasniku odnosno korisniku zemljišta, dužan je pričinjenu štetu vlasniku odnosno korisniku zemljišta nadoknaditi.

Član 30.

U slučaju sumnje ili pojave zaraznih oboljenja pčela, držalac pčela je dužan obavijestiti veterinarsku stanicu i veterinarsku inspekciju koja će naložiti odgovarajuće mjere, do nalaza ovlaštenih institucija. U slučaju pozitivnog nalaza zaraznih bolesti pčela, koje se suzbijaju po zakonu, držalac pčela je dužan da sprovede naređene i propisane mjere.

Član 31.

Izvršenje propisanih i naređenih mjera u svrhu suzbijanja i iskorjenjivanja zaraznih bolesti, vrši stručna služba za epizootiologiju i zooprofilaksu Veterinarske stanice u prisustvu nadležne inspekcije i Komisije za utvrđivanje štete formirane od strane kantonalnog ministarstva.

Komisija iz stava 1. ovog člana vrši procjenu štete nanesene pojavom zarazne bolesti.

Član 32.

Nadzor nad izvršenjem ovog pravilnika vrše nadležne Kantonalne inspekcije.

Član 33.

Ovaj pravilnik stupa na snagu danom objavljivanja u "Službenim novinama Kantona Sarajevo".

Broj 07-06-24-1381 10. augusta 2000. godine Sarajevo

Ministar Zaim Backović, s. r.